

29. Douv. ² ARREST 1644. no. 2

DV CONSEIL

D'ESTAT DV ROY,
SA MAIESTE' Y SEANT,
portant surseance de toutes poursui-
tes à l'encontre des Ecclesiastiques,
pour raison du droict de Confirma-
tion, & cependant leur fait main-
leuee de toutes les saisies qui pour-
roient auoir esté faites sur eux, ou sur
leurs Receueurs & Fermiers, à cause
dudit Droict.



A P A R I S,

Chez Antoine Vitré, Imprimeur ordina-
re du Roy, de la Reyne Regente,
& du Clergé de France.

M. D C. X L I I I I.

Avec Prinilege de sa Majesté.

8 A. J. Sar 3 {

Extrait du Privilege du Roy.

LE Roy par ses lettres patentes, a permis à Antoine Vitré son Imprimeur ordinaire & du Clergé de France, d'imprimer tous les *Edicts, Declarations, Lettres patentes, Arrests, & autres choses generalement quelsconques concernant les affaires dudit Clergé*, & ce pour le temps de seize ans. Avec deffenses à tous autres de les imprimer, faire imprimer, contrefaire, ny d'en vendre d'autre que de l'impression dudit Vitré, à peine de trois mil liures d'amende, confiscation des exemplaires, despens, dommages, & interests : comme il est plus à plein contenu esdites lettres données à Paris le 20. jour d'Aoust 1635. Signées par sa Majesté en son Conseil,

VICTON.



*EXTRAICT DES REGISTRES
du Conseil d'Estat.*


S V R ce qui a esté représenté au Roy estant en son Conseil, par les Agens Generaux du Clergé de France; Que les Roys ses predecesseurs ont tousiours considéré les droicts appartenans au Clergé, & les concessions faites aux Eglises comme des choses sacrées, & par vne emulation digne de Roys tres-Chrestiens les ont confirmez, & augmentez successiuement sans aucun intersts que des Prieres & Oraisons, qui sont le veritable tribut que doiuent les Ecclesiastiques : Et bien que depuis l'establissement du droict de Confirmation, payable par les Officiers & priuilegez Laïcs à chaque mutation de Regne, les Partisans & Traictans ayent quelquefois fait comprendre les gens d'Eglise dans leurs Commissions particulieres, (quoy qu'ils ne fussent pas nommez dans

les Edicts & Declarations ;) Neantmoins ces surprises n'ont iamais esté approuuées, & l'on voit par les Lettres patentes des Roys Henry III. & Henry IV. en 1586. & 1598. verifiées au Parlement de Paris: Que les Ecclesiastiques ont esté declarez exēpts de toutes taxes pour la confirmation de leurs droits generalement quelsconques, & specialement de leurs vsages & chauffages, pannages, pascages & pasturages, avec restitution des sommes qu'ils auoient esté contraincts de payer. Et de fait, quelque necessité où l'Estat ait peu estre reduit, & quelques guerres Ciuiles ou estrangeres, mesme de Religion que la France ait soutenues, iamais on ne s'est aduisé d'assujettir le Clergé à de pareilles taxes, & parmi tous les Registres de la Chambre des Comptes de Paris, il ne s'en trouuera aucun qui en fasse mention; Mais outre cette possession qui sous vn regne de pieté & de Iustice, est vn tiltre plus que suffisant, tous les biens, droicts & emolumens, dont les Ecclesiastiques iouissent à cause de leurs Bene-

fices, ayans esté admortis sans aucune re-
 ferue, par le Contract passé à Mante, en
 l'an 1641. il s'ensuit qu'ils sont irreuoca-
 bles comme dédiez à Dieu & hors du
 commerce des hommes, & que n'estans
 point sujètes à Confirmation ils ne peu-
 uent l'estre par consequent à des Taxes
 pour raison d'icelle. Aussi sa Majesté non
 plus que les Roys ses predecesseurs n'a
 compris ny denommé le Clergé dans ses
 lettres de declaration touchant le droict
 de confirmation à la Couronne; Et néant-
 moins Maistre Jean le Maire chargé du re-
 couurement de ce droict, poursuit les Ec-
 clestiastiques comme s'ils y estoient cōtri-
 buables, & par surprise les a fait compren-
 dre dans vn Arrest du Conseil, du 23. Jan-
 uier dernier, de mesme que dans vn regle-
 ment du 24. Iuillet ensuiuant, en consé-
 quence desquels il n'y a nul doute qu'il ne
 mist vn desordre general dans les Dioce-
 ses, & que cette nouueauté ne fust l'op-
 pression & la ruine totale du Clergé, s'il n'y
 estoit promptement pourueu. LE ROY

estant en son Conseil, la Reyne Regente sa Mere presente; Apres s'estre fait représenter les lettres de Declaration du 24. Octobre dernier, lesdits Arrests du 23. Ianuier, 24. Iuillet, & autres donnez en consequence. Ensemble les Lettres patentes des Rois Henry III. & Henry IV. cy-dessus enoncées, sans s'arrester ausdites Arrests, en ce qui concerne les Ecclesiastiques, A sursis & surseoit toutes poursuites à l'encontre desdits Ecclesiastiques, pour raison dudit droict de confirmation iusqu'à ce qu'autrement par sa Majesté en ait esté ordonné, & cependant leur a fait main-leuée de toutes saisies qui pourroient auoir esté faites sur eux, leurs Receueurs & Fermiers à cause dudit droict. FAIT au Conseil d'Etat du Roy, sa Majesté y estant, la Reyne Regente sa Mere presente, tenu à Paris le 29. iour d'Aoust 1644. Signé LOVVS, Et plus bas, Par le Roy, la Reyne Regente sa Mere presente. DE GVENEGVAVD, & Seellé.

LOVIS par la grace de Dieu Roy de
 France & de Nauarre. Au premier no-
 stre Huissier ou Sergent sur ce requis, Salut :
 Nous te mandons & commandons que l'Ar-
 rest dont l'extraict est cy-attaché, sous le con-
 tre-seel de nostre Chancellerie, ce iour d'huy
 lonné en nostre Conseil d'Estat, Nous y estant,
 la Reyne Regente nostre tres-honnorée Dame
 & Mere presente, sur ce qui nous a esté repre-
 senté en iceluy par les Agens Generaux du
 Clergé de France, Tu signifie à Maistre Iean
 le Maire y denommé, & à tous autres qu'il
 appartiendra à ce qu'ils n'en pretendent cause
 d'ignorance, & fais pour l'execution dudit
 Arrest, tous commandemens, sommations de-
 fences & autres actes, & exploits necessaires,
 sans demander autre permission, nonobstant
 clameur de Haro, Chartre Normande prise
 à partie & Lettres à ce contraires, & sera
 adiousté foy comme aux Originaux, aux cop-
 pies dudit Arrest, & des presentes collation-
 nées par l'un de nos amez & feaux Conseil-
 lers & Secretaires. Car tel est nostre plaisir.
 DONNE' à Paris le 29. iour d'Aoust l'an de

Grace 1644. Et de nostre regne le deuxiesme. Signé LOVIS, Et plus bas, Par le Roy, la Reyne Regente sa Mere presente, DE GVENEGA VD.  Seellé.

Signifié au Traittant le 2. Septembre 1644.

Collationné aux Originaux par moy
Conseiller & Secretaire du Roy,
& de ses Finances.